



Uniun dals Grischs

Protocol da la radunanza generala dals 10 avrigl 2010

Zernez, Hotel dal Uors, 9.30 - 12.30

Preschaint(a)s in tuot 43: delegats da las secziuns 21, rapreschantants da cumüns 12, suprastanza 5, ulteriurs 5 (giasts, medias, LR)

S-chüsas: Urs Cadruvi, secr. gen. LR, cumüns da Segl e Tarasp, grondcusglier(a)s A.Perl, e Chr.Hartmann; Duri Bezzola (SRG.R), Jon Carl Tall (URB), Linard Marugg (cuvì).

Tractandas

1. Salüd
2. Approvaziun dal protocol da la radunanza generala dals 25-04-09
3. Rapport presidial 2009
4. Rapport Chesin Manella e Chalender Ladin
5. Rendaquint 2009 e rapport da la cumischiun da gestiun
6. Contribuziun annuala
7. Program da lavur 2010/2011
8. Preventiv 2011
9. Moziuns da commembers
10. Orientaziuns e varia

Act festiv:

La radunanza vain drivida ed inromada sco üsità cun musica e chant, quista vouta dal giuven musicist Dario Widmer da Zernez.

Il premi d'arcugnuschentscha UdG 2010 va a la giuvna Flurina Furrer chi maina ün affar da cuafför a Vulpera. Siand ella impedida da gnir, piglia incunter il premi per ella seis bap Mario Furrer.

Tractandas

1. La presidenta Maria Sedlacek dà il bivgnaint e driva la part statutarica da la radunanza.
2. Il protocol da la radunanza generala dals 25 avrigl 2009 vain approvà sainza resalvas.
3. In seis rapport presidial da l'on 2009 dà la presidenta üna cuorta retrospectiva da las trattativas tanter l'UdG, il departamaint d'educaziun e'ls rapreschantants da la magistraglia concernent il rumantsch grischun illas scoulas da l'Engiadina; in november 2009 sajan lura ils resultats da la gruppa da lavur gnüts preschantats a la CGL, a grondcusgliers, capos e presidents dals cussagls da scoula, culs puncts principals: ingüna alfabetisaziun in rg – lingua d'instrucziun resta il vallader e'l puter; a partir da la 4. classa introducziun passiva dal rg; traducziun dal mez d'instrucziun «Viver en il Grischun» aint ils idioms (in fuorma electronica). Plünavant aintra la presidenta cuortamaing i'ls puncts seguaints: realisaziun da novs DVD's per uffants, proget d'integrasiun linguistica *Piripiri*, proget *Multiplicaturs i'ls cumüns*. Da las bleras occurrenzas ed arrandschamaints manzuna ella specialmaing quels dal Chesin Manella, la dieta Peider Linsel a Sent e'l Grond Bal Ladin in Val Sinestra. In connex cun müdadas personalas ingrazcha ella a Duri Denoth ed Alexander Mischol per lur ingaschamaint i'l center LR Zernez chi'd es i a fin.

4. Pol Clo e Claudia Nicolay dan giò rapport pel Chesin Manella e'l Chalender Ladin:

Il Chesin Manella es dvantà lö d'administraziun e d'occurenzas da l'UdG. Uschè han gnü lö var 14 arrandschamaints sco eir duos exposiziuns da purtretts, conversaziun rumantscha regulara ed oter plü. Il public ha planet chattà la via aint il Chesin Manella. E sco prüma ediziun «made by chesin M.» saja sorti il DVD cun las plü bellas fablas dal muond.

Pel Chalender Ladin es quist l'ultim rapport dals Nicolay's. Els ingrazchan a Gian Duri Gross ed al center LR Zernez per la buna collavuraziun, als cuvis pel success da la vendita (totalmaing plü co 2900 exemplars), e beneventeschan a Sidonia e Göri Klainguti sco lur successurs illa redacziun dal chalender.

5. Il chaschier Riet Ganzoni preschainta il rendaquint per l'on 2009. Il quint curraint serra cun ün avanz da frs 16'085.45. Implü resulta ün augmaint dals titels da valor ill'otezza da frs 17'450.75. Il bilantsch preschantà nu dà andit a remarchas, e dal rapport da revisiun da Marcel Franziscus e Jan Ruinatscha vain dat prelecziun. La radunanza approuva il rendaquint 2009 sainza cuntravusch.

6. La radunanza decida da laschar la contribuziun da commember sco fin qua: 16.—frs per commembers singuls (a listess temp es quai il predsch dal Chalender Ladin) e frs 1.50 pro abitant pels cumüns.

7. Ils accents dal program da lavur 2010/2011 sun, sco cha la presidenta preschainta, las staintas per sgürar avuonda magisters/magistras rumantschas per nossas scoulas e per sgürar inavant la matura bilingua, la realisaziun d'ulteriurs DVD's rumantschs per uffants, ils contacts tanter las 3 suprastanzas da las uniuns affiliadas chi dessan gnir intensivats, Pro las ediziuns vegnan manzunadas la Chasa Paterna 2010 chi sortirà da stampa cun texts puters da Dr. Attilio Bivetti, e'l dicziunari da scoula *Buonder cun cornas* chi'd es bod pront, grazcha a la gronda lavur d'adattamaint da Barbara Strebel.

Il collavuratur regional Mario Pult preschainta e spiega il proget da la LR *Multiplicaturs i'ls cumüns* e'ls cuors d'integrasiun sociolinguistica (proget *Piripiri*). Implü muossa el via sün las duos dietas in memoria da Jon Semadeni (29 mai a Lavin) ed Armon Planta (18 settember a Sent), sco eir sün l'arrandschamaint *Convivenza*, la festa organisada da la LR, la Pro Grigioni Italiano e l'Uniun dals Gualsers in october ill'arena da Cazis.

8. Il chaschier preschainta il preventiv 2011 chi prevezza ün deficit da gestiun da raduond 15'500 frs. La radunanza approvescha il preventiv sainza cuntervuschs.

9. Moziuns da commembers nu sun gnüdas inoltradas ingünas.

10. Varia

- Jacques Guidon deponescha il giavüschi urgiaint d'organisar cuors da perfecziunamaint da rumantsch per magisters.
- Carola Bezzola intimescha da ramassar adressas electronicas per pudair comunicar meglder arrandschamaints rumantschs.
- Giancarlo Conrad manaja cha'l problem dals magisters rumantschs (reg. scolaziun rumantscha e s-charsdà d'absolvents) saja cundiziunà politicamaing.
- Jon D. Parolini replicha chi saja il mumaint da tour influenza sül sböz per la ledscha da scoula, e quai fingià *avant* cha'l proceder da consultaziun cumainza

La radunanza vain serrada cun ün cuort pled final e'ls ingrazchamaints da la presidenta.

Pel protocol. l'actuar:
Men Janett